



MAJLIS PERBANDARAN SEBERANG PERAI

TEKS UCAPAN

YBHG. DATO' Sr HAJI ROZALI BIN HAJI MOHAMUD
YANG DIPERTUA
MAJLIS PERBANDARAN SEBERANG PERAI

SEMPENA

MAJLIS PENYAMPAIAN HADIAH ANUGERAH
SEKOLAH HIJAU 2018

OLEH

YANG BERTHORMAT TUAN PHEE BOON POH
AHLI MAJLIS MESYUARAT KERAJAAN NEGERI PULAU
PINANG MERANGKAP Pengerusi Jawatankuasa
Kebajikan, Masyarakat Penyayang dan Alam
Sekitar

TARIKH / MASA / TEMPAT
19 NOVEMBER 2018 (ISNIN)
9.30 PAGI

AUDITORIUM MENARA MPSP
BANDAR PERDA
BUKIT MERTA JAM

Disediakan oleh Jabatan Korporat dan Perhubungan Antarabangsa

Ucapan YBhg. Dato' YDP MPSP 2018

Terima kasih Saudara/Saudari Pengacara Majlis

Yang Berhormat Tuan Phee Boon Poh

Ahli Majlis Mesyuarat Kerajaan Negeri Pulau Pinang
Merangkap Pengerusi Jawatankuasa Kebajikan, Masyarakat Penyayang
Dan Alam Sekitar

Yang Dihormati Ahli-Ahli Majlis

Majlis Perbandaran Seberang Perai

Yang Berusaha Puan Ir. Hjh Rosnani Binti Hj Mahmod

Setiausaha Perbandaran MPSP

Yang Berusaha Encik Luciano Oliveira

Pengarah Urusan

Continental Automotive Components (Malaysia) Sdn. Bhd.

Ketua-Ketua Jabatan dan Pegawai-Pegawai Kanan

Majlis Perbandaran Seberang Perai

Kakitangan-Kakitangan

Majlis Perbandaran Seberang Perai

Para Guru

**Yang diraikan para pelajar-pelajar yang mengambil bahagian dalam
Program Sekolah Hijau MPSP 2018**

Rakan-Rakan Media

Tuan-Tuan Dan Puan-Puan Yang Dihormati Sekalian

Assalamualaikum warahmatullahi wabarakatuh,

Selamat pagi dan salam sejahtera,

Alhamdulillah, bersyukur kehadiran Allah S.W.T. kerana dengan izin dan limpah kurnianya dapat kita bersama-sama pada hari ini di dalam Majlis Penyampaian Hadiah Anugerah Sekolah Hijau 2018 Peringkat Seberang Perai anjuran bersama Continental Automotive Components (Malaysia) Sdn. Bhd.

Terlebih dahulu, saya ingin mengambil kesempatan ini mengucapkan ribuan terima kasih dan sekalung penghargaan kepada Yang Berusaha Encik Luciano Oliveira, Pengarah Urusan Continental Automotive Components (Malaysia) Sdn. Bhd. dan kakitangan-kakitangannya yang telah sudi menaja dan menjadi rakan penaja dalam pelaksanaan program Anugerah Sekolah Hijau 2018 Peringkat Seberang Perai tahun ini. Pihak Continental Automotive Components (Malaysia) Sdn. Bhd. telah bekerjasama dengan MPSP dalam menganjurkan Majlis Anugerah Sekolah Hijau sejak tahun 2010 lagi. Tahun 2018 merupakan tahun kesembilan Continental Automotive Components (Malaysia) Sdn. Bhd. menjadi penaja utama program ini.

MPSP amat berterima kasih kepada Continental Automotive Components (Malaysia) Sdn. Bhd. dan kakitangannya di atas sokongan padu yang berterusan dalam memperkasakan pendidikan dan kesedaran pemuliharaan dan pemulihan alam sekitar di kalangan murid-murid di sekolah-sekolah di Seberang Perai. Diharap penajaan ini akan diteruskan pada tahun-tahun yang akan datang. Saya juga menyeru agar lebih banyak penaja tampil ke hadapan untuk bersama-sama MPSP dalam menjayakan program-program seumpama ini.

Selain itu, tidak lupa juga penghargaan dan ucapan terima kasih kepada Jabatan Pendidikan Negeri Pulau Pinang kerana sudi bekerjasama dengan MPSP dalam Anugerah Sekolah Hijau ini. Jutaan terima kasih juga kepada Jabatan Alam Sekitar kerana turut memberi sokongan dalam menjalankan program ini.

Saya ingin mengucapkan ribuan terima kasih kepada Yang Berhormat Tuan Phee Boon Poh, Ahli Majlis Mesyuarat Kerajaan Negeri Pulau Pinang Merangkap Pengerusi Jawatankuasa Kebajikan, Masyarakat Penyayang Dan Alam Sekitar, tuan-tuan dan puan-puan yang dihormati sekalian kerana sudi hadir ke majlis ini.

Yang Berhormat, Tuan-Tuan dan Puan-Puan yang dihormati sekalian,

Program Sekolah Hijau merupakan program pengauditan alam sekitar bagi sekolah-sekolah di Negeri Pulau Pinang yang dilancarkan oleh Kerajaan Negeri Pulau Pinang kepada Sekolah Rendah dan Sekolah Menengah pada tahun 2010. Di sekolahlah keperibadian dan persepsi manusia dapat dibentuk dan dicorakkan. Program ini, diharapkan dapat membentuk generasi masa hadapan yang menghargai alam sekitar.

Tujuan program ini ialah untuk memberi pendekatan secara holistic dalam pengurusan alam sekitar dan menggalakkan penambahbaikan secara berterusan. Program ini menerapkan pendidikan alam sekitar kepada semua pelajar untuk membina generasi yang mampu menjaga alam sekitar untuk masa hadapan. Program ini memberikan pengiktirafan kepada pihak sekolah dalam mengurangkan sisa buangan, penjimatan sumber dan matlamatnya untuk pemeliharaan dan pemuliharaan alam sekitar. Program Anugerah Sekolah Hijau adalah salah satu Pelan Tindakan Local Action 21 MPSP dalam usaha untuk menggalakkan dan melahirkan sebuah masyarakat dan komuniti setempat yang sihat dan peka terhadap isu-isu alam sekitar untuk diseimbangkan dengan perkembangan ekonomi dan pembangunan sosial.

Visi sekolah hijau adalah “**Penggerak Kelestarian Alam Sekitar**”. Manakala misinya pula adalah “**Berusaha Berterusan Bersama MPSP Bagi Merealisasikan Amalan 8R iaitu *Rethink, Refuse, Reduce, Reuse, Repair, Re-Gift, Recover and Recycle* Demi Generasi Akan Datang**”.

Kumpulan sasaran untuk Anugerah Sekolah Hijau 2018 adalah Sekolah Rendah dan Sekolah Menengah. Setiap sekolah yang menyertai pertandingan Anugerah Sekolah Hijau 2018 ini akan dinilai berdasarkan beberapa kriteria utama iaitu Kecekapan Sumber Asli, Inovasi dan Kreativiti, Kebersihan dan Penghijauan, Penglibatan Komuniti dan juga Persembahan.

Sepanjang tempoh Anugerah Sekolah Hijau ini dijalankan, terdapat peningkatan dalam penyertaan dari pihak sekolah, di mana penyertaan daripada sekolah rendah telah meningkat daripada 14 sekolah pada tahun 2010 kepada 116 sekolah pada tahun 2018. Manakala penyertaan sekolah menengah pula telah meningkat daripada 16 sekolah pada tahun 2010 kepada 46 sekolah pada tahun 2018.

Yang Berhormat, Tuan-Tuan dan Puan-Puan yang dihormati sekalian,

Majlis Pelancaran Anugerah Sekolah Hijau ini dilancarkan pada 8 Februari 2018 dan penilaian panel adalah dalam bulan September 2018. Daripada 162 sekolah yang mengambil bahagian hanya 92 sekolah telah disenarai pendek untuk penilaian panel.

Hadiah yang disediakan adalah untuk Johan, Naib Johan, Tempat Ketiga, Anugerah Emas, Anugerah Perak dan Anugerah Gangsa. Selain itu, Anugerah Khas juga akan diberikan untuk kategori Program Sisa Sifar, Kebersihan dan Penghijauan, Inovasi dan Kreativiti, Penglibatan Komuniti dan juga Penghaslian Pengurangan Karbon Tertinggi. Syabas dan tahniah kepada pemenang Pertandingan Anugerah Sekolah Hijau Tahun 2018. Saya merasa amat bangga atas penglibatan kesemua sekolah dalam menjayakan program ini ke tahap yang membanggakan.

Yang Berhormat, Tuan-Tuan dan Puan-Puan yang dihormati sekalian,

Program Anugerah Sekolah Hijau telah dilaksanakan dengan jayanya semenjak 2010 sehingga kini dan saban tahun, terdapat peningkatan dalam penyertaan dari sekolah-sekolah dalam program ini. Keseluruhan jumlah

sekolah yang menyertai Anugerah Sekolah Hijau ini telah meningkat dari 30 buah sekolah pada 2010 kepada 162 sekolah bagi tahun 2018.

Saya telahpun mengesyorkan agar pembaharuan atau penambahbaikan dibuat ke atas Program Anugerah Sekolah Hijau seperti:-

- i. Pertandingan kuiz kualiti air bagi sekolah rendah dan sekolah menengah yang akan dilaksanakan pada tengah hari ini di Autocity, Juru;
- ii. Latihan penghasilan barang-barangan *upcycle* serta kursus keusahawanan. Pertandingan boleh ditumpukan kepada jenis serta kreativiti barang-barangan *upcycle* yang dihasilkan;
- iii. Sekiranya guru dan pelajar yang berjaya dan cemerlang dalam hasil inovasi dalam bidang kitar semula dan *upcycle*, maka mereka akan dicalonkan untuk pembentangan hasil inovasi di peringkat antarabangsa;
- iv. Guru-guru dan pelajar-pelajar sekolah dilantik menjadi duta MPSP dalam usaha pengurangan sampah dan mempromosikan aktiviti kitar semula;

- v. Sekolah yang berjaya menjadi johan Anugerah Sekolah Hijau diberikan sumbangan panel solar, seiring dengan hasrat Seberang Perai ke arah Bandaraya Rendah Karbon pada tahun 2022. Di sini saya ingin mengumumkan bahawa Syarikat Jinko Solar telah menyumbang hadiah panel solar yang berkapasiti 8 kilowatt kepada Johan Anugerah Sekolah Hijau pada hari ini iaitu panel solar berkapasiti empat (4) kilowatt bagi Johan Sekolah Menengah dan panel solar berkapasiti empat (4) kilowatt bagi Johan Sekolah Rendah.

MPSP juga telah berkerjasama dengan sekolah-sekolah hijau di Seberang Perai untuk membuat penanaman pokok Pokok Teduhan dari jenis *Xanthostemon chrysanthus* (Golden Penda) secara serentak Sempena Hari Kemerdekaan Yang Ke-61. Sebanyak 5,100 batang pokok telah berjaya ditanam di seluruh Seberang Perai dengan penglibatan 24 Sekolah Rendah dan 13 Sekolah Menengah. Program penanaman pokok ini telah dimasukkan ke dalam *Malaysia Book of Records* sebagai “*The Largest Golden Penda (Xanthostemon chrysanthus) Tree Planting Event*”.

Yang Berhormat, Tuan-Tuan dan Puan-Puan yang dihormati sekalian,

Saya mengucapkan sekalung tahniah dan syabas kepada sekolah-sekolah yang telah berjaya menjadi Johan dalam pertandingan Anugerah Sekolah Hijau 2018 yang akan diumumkan sebentar lagi. Bagi yang tidak berjaya, jangan putus asa, walaupun tidak berjaya untuk menjadi Johan tetapi sebenarnya anda semua telah Berjaya menunjukkan komitmen yang tinggi serta melaksanakan ciri-ciri amalan hijau dengan cemerlang ke arah perubahan alam sekitar yang positif. Saya berharap ianya dapat memberi inspirasi kepada semua untuk menjadikan Seberang Perai sebuah Bandaraya Rendah Karbon dan Bandaraya Pintar menjelang tahun 2022.

MPSP ingin mengucapkan terima kasih kepada Syarikat Continental Automotive Components (Malaysia) Sdn Bhd, Syarikat Jinko Solar dan guru besar sekolah-sekolah yang menyertai pertandingan ini. Diharap dengan adanya pertandingan ini, akan Berjaya menarik dan memupuk minat golongan para pelajar dan para pendidik untuk menjadikan aktiviti pemeliharaan alam sekitar sebagai satu budaya. Agensi pendidikan adalah satu titik mula yang penting dalam membentuk masyarakat yang menjaga dan mencintai alam sekitar sejajar dengan matlamat Majlis Perbandaran Seberang Perai untuk menjadi Bandaraya Rendah Karbon menjelang tahun 2022.

Sekian,

***Wabillahi Taufik Wal Hidayah, Wassalamualaikum Warahmatullahi
Wabarakatuh.***

Terima kasih.